

《重建從謙橋碑》(左)

竊以三秋鵲渡，雙星喜會於銀河，十月梁成，行客不虞乎病涉，古來或託於寓言，或勤於政事，莫不重橋樑之建設也。茲我安樂村前，從謙校畔，熙來穰往，其中尤以從謙學子為多，獨是盈盈一水，悵悵何之，纔添鴨漲，即占滅頂之虞，曾建虹腰，差免淪身之患。但因建築不牢，加以星霜迭換，中流之砥柱遂覺動搖；安設之石樑，亦遭傾跌，故于年端陽之候，洪濤陡漲，遂有溺斃鄉人之慘聞也。同人有見及此，咸謂欲免異日之淪胥，必要及時重建。幸蒙大埔理民府准予興築，並荷政府津助鉅款，以為建築之用，復賴諸君子拯溺情殷，渡生心切，見義勇為，解囊勸助，經之營之，不日成之。茲者中流有砥柱之安，行見永古，絕馮夷之患，同人利涉，無煩一葦之航，王道蕩平，盡戴群公之德。芳名泐石，用誌不忘。(捐者芳名略)



中華民國拾七年歲次戊辰十月三十日
西曆一千九百二十八年十二月十一日
經理人彭樂三

《大埔理民府示諭》碑 (右)

大埔理民府傳 為出示曉諭事：照得從謙學校附近橋樑兩岸，係屬重要地段，業經該校主彭樂三等建築基壘、種植竹木、以圖保護。乃聞無知鄉民，貪圖近便，罔顧公益，擅在該地挖取砂石，實足破壞基壘，危害橋樑，殊屬謬妄。為此，諭爾各鄉民人等知悉：自後無論何人，不得再向此間挖取砂石，貽害公益。各宜凜凜毋違，切切特示。



一千九百二十七年十二月十九日示，